

# TEZĂUR LITURGIC

## 14 IANUARIE

# ACATISTUL SF. IERARH SAVA I, ARHIEPISCOPUL SERBIEI



MOSCOVA, 2000



# **Акафист**

## **святителю Савве,**

## **архиепископу Сербскому**

### **Кондак 1**

Избранный от Царя сил Господа Иисуса Христа и призванный благодатию от королевского рода во иночество и архиерейство, первосвятителю Сербския Церкви, богоносне отче Савво, удовли нас восхваляти тя с любовью, яко благодарованного пастыря и учителя нашего; ты же, имея дерзновение ко Господу, вкупе с отцем и братом твоима по плоти, мироточивым Симеоном и преподобным Симоном, первовенчанным краем, молися выну о спасении всего достояния своего, православного народа сербского, и о нас грешных, избавляя от всяких зол, бед и скорбей, вопиющая ти:

Радуйся, святителю Савво, первопастырю и учителю Сербский, дивный чудотворче.

## Икос 1

Ангельскую чистоту от юности возлюбив,  
Савво блаженне, во младости великий  
подвижник благочестия показался еси, во еже  
всем дивиться благонавию и благочестию души  
твоея, зане яко юноша сый и кралевиц  
рождением, постом, бдением и молитвами, плоть  
твою обуздал еси. Сего ради и слышиши от нас  
похвальныя песни таковыя:

Радуйся, отца благочестиваго и матере  
благонаправныя, сыне Богом возлюбленне;

Радуйся, единого Бога всем сердцем твоим  
возлюбивый;

Радуйся, рождением твоим родителя  
утешивый и неплодие ею разрешивый;

Радуйся, плод благословенный, многими  
молитвами испрошенный;

Радуйся, королевскаго рода Немани отрасль  
святопрозябшая;

Радуйся, Сербския земли духовная красото;

Радуйся, родителю твоею в старости  
утешение и радование;

Радуйся, има паче других чад, зело любимый;

Радуйся, плотоугодие еще во младости отвергнувый;

Радуйся, о благих небесных паче неже о земных выну помышлявый;

Радуйся, чистоты душевныя и телесныя добрый рачителю.

Радуйся, святителю Савво, первопастырю и учителю Сербский, дивный чудотворче.

### **Кондак 2**

---

Видев суету и непостоянство славы земныя, Савво богомудре, устремился еси духом твоим в горняя ко Господу, Иже зря твое желание божественное, посла к тебе инока преподобнаго из святыя горы Афонския, егоже поучением наставляемый, оставил еси родителя твоя и отечество твое, в жребий же земный Пресвятыя Богородицы на святую гору Афонскую пришел еси, и тамо во обители Российстей водворился еси, зовый немолчно с работающими Господеви, ангельскую песнь: Аллилуия.

### **Икос 2**

---

Разумевше отшествование твое, родителя твоя плакастися горце, скорбяще о твоём лишении, Савво преподобне, таже помыслиша и абие

послаша искати тя даже до Афона верныя слуги своя, яко да убедят тя к нима возвратитися. Ты же, святе, пришествие посланных слугъ уведев, мудре с ними беседовал еси, таже от них удалився, на пиргъ высокий возшел еси, и тамо пострижение иноческое восприявый, королевскую ризу твою, вкупе с власы главы твоея, в пострижении отятыми, посланным тем с пирга повергъ еси, заповедав им рещи родителема твоима, яко сын ею Растко, уже инок Савва есть. Таковую ревность твою о спасении поминающе, зовем ти сице:

Радуйся, владения земнаго славу презревый;

Радуйся, родителя твоя и отечество твое Христа ради оставивый;

Радуйся, на святую Афонскую гору работати Господеви пришедый;

Радуйся, во обители Российстей тамо водворивыйся;

Радуйся, сея обители постриженец бывый;

Радуйся, подвиги твоими оную прославивый;

Радуйся, яко в ней доселе имя твое молитвенно ублажается;

Радуйся, яко обитель сия тобою светло красуется;

Радуйся, подвиги поста и молитвы отцев Афонских удививый;

Радуйся, во единой власянице босыма ногама обители Афонския обошедый;

Радуйся, талант, врученный ти, умноживый;

Радуйся, в послушание старцу богомудрому во обители Ватопедстей себе предавый;

Радуйся, во смирении и терпении зело преуспевый.

Радуйся, святителю Савво, первопастырю и учителю Сербский, дивный чудотворче.

### **Кондак 3**

---

Силою Всевышняго укрепляемый, святче Божий, подвиги великия во иночестве совершал еси, во обители Ватопедстей на Афоне, постом, бдением и всяким изнурением умерщвляя плоть твою, мраз и зной терпел еси, аки безплотный, и бос ходяй по острому камени неуязвим пребывал еси, покаяя плоть духу, любовь ко Господу выну пламеневый, во еже пети тебе немолчную Ему песнь: Аллилуия.

### Икос 3

Имея попечение о спасении душевнем  
родителю твоею, отче Савво, выну молился еси  
о сем Богу. Благий же Человеколюбец, творяй  
волю боящихся Его, внуши родителема твоима  
писанием твоим к нима зело умиленным,  
владение земное оставить и пострижение  
иноческое воспринять. Сего ради отец твой,  
преподобный Симеон, из Сербии на Афон  
прииде и вкупе с тобою в Ватопеде водворися, с  
ним же ты ныне ублажаем и зовем:

Радуйся, спасения душевнаго родительма  
твоима усердный желателю;

Радуйся, ко оставлению славы земныя, има  
богомудрый советодателю и увещателю;

Радуйся, пришествием к тебе на Афон отца  
твоего зело утешенный;

Радуйся, спостник и сомолитвенник ему  
бывый;

Радуйся, подвиги иноческия нести ему  
помогавый;

Радуйся, немощи его старческия терпеливо  
носивый;



Радуйся, в недужех ему любвеобильно  
послуживый;

Радуйся, тяготу скорбей и лишений  
пустынных ему облегчивый;

Радуйся, подвиги твоими подвиги отчия  
восполнявый;

Радуйся, угодника Божия истинного его  
совершивый;

Радуйся, его благословением святым  
осененный;

Радуйся, вкупе с ним от верных людей  
молитвенно почитаемый.

Радуйся, святителю Савво, первопастырю и  
учителю Сербский, дивный чудотворче.

#### **Кондак 4**

---

Бурею моря житейскаго обуреваемым, тихое  
пристанище на Афоне построить потщался еси,  
отче Савво, иноческую сербскому роду обитель,  
Хилендарь именуему, юже Пресвятей  
Богородице посвятил еси, храмы Божиими и  
зданьми многими сию украсив, имением же  
довольным ю снабдив, и грамотами царей  
утвердив, в нейже и сам с родителем твоим,  
преподобным Симеоном, вселился еси жити.

Сего ради обитель сия вы оба ктиторома своима почитает, и памяти ваши торжествующи, молебнo возсылает хвалебную песнь Богу: Аллилуия.

#### **Икос 4**

---

Слышав звание Божие преподобный Симеон, к вечным обителем его призывающее, стяжа тя, Савво богоносне, молитвенного помощника при исходе своем, и на руку твоею сыновню дух свой Господеву предаде, тело же его святое ты с подобающею честью во гробе мраморне в соборном храме Хилendarския обители положил еси, и молитвами твоими мощем отца твоего мироточения благодать от Бога испросил еси, сим подвизая верныя люди звати к тебе:

Радуйся, всесильный и богоприятный к Богу молитвенниче;

Радуйся, равноангельный человеце;

Радуйся, яко святые мощи и самый гроб отца твоего, по молитве твоей к Богу, миро благоуханное и целебное источиша;

Радуйся, яко сим зело обрадованный Бога немолчно славословил еси;

Радуйся, яко отец твой преподобный, по смерти послушание дивное тебе показа;

Радуйся, яко по твоему прошению, изсякшее от гроба миро, паки источися;

Радуйся, во славе святых отца твоего таинственно созерцавый;

Радуйся, во светлом видении обетования благия от него услышавый;

Радуйся, яко по заповеди отца твоего мощи его от Афона в Сербию тобою принесени быша;

Радуйся, яко тако в обители Студеницкой со славою многою тобою положени быша;

Радуйся, прославления отца твоего в лице святых виновниче;

Радуйся, святых памяти его усердный почитателю.

Радуйся, святителю Савво, первопастырю и учителю Сербский, дивный чудотворче.

### **Кондак 5**

Богосиянное светило быв, Савво богомудре, волею Пастыреначальника Иисуса, на свещнице Сербския Церкви поставлен был еси, и от патриарха Вселенскаго во архиепископа

сербскому народу от земли его явился еси, егоже тщательно везде и всегда поучал еси в вере святей православней твердо и неуклонно пребывать, богоугодно же возносить хвалебную песнь Пресвятей Троице: Аллилуия.

## Икос 5

---

Видев себе разлучаема с любимою тобою афонскою пустынею, отче Савво, скорбел еси духом твоим, обаче Пресвятая Богородица явися ти в светлом видении, и обетованьми помощи от Нея и заступления, скорбящую душу утеши и укрепи. Тебе сие обрадовану видением и беседою Царицы Небесныя, и мы, земнии, радостно вопием:

Радуйся, избранный сосуде Духа Святаго;

Радуйся, при хиротонии твоей светом небесным свыше осиянный;

Радуйся, таинниче Пресвятыя Троицы;

Радуйся, собеседниче Пресвятыя Богородицы;

Радуйся, слышавый от уст Ея милостивыя глаголы;

Радуйся, приемый от Нея обетование помощи и заступления;

Радуйся, равноапостольный Сербския страны  
первопрестольниче;

Радуйся, учредителю богоблагословенныя  
иерархии, поставлением епископов в Сербстей  
державе;

Радуйся, краснеи нозе твои направивый к  
распространению проповеди Евангельския;

Радуйся, Сербию светом Христовым  
совершенно просветивый;

Радуйся, многи храмы Божии и обители  
иноческия в ней воздвигнувый;

Радуйся, щедродательный милостыни  
подателю;

Радуйся, благосердный нищих питателю.

Радуйся, святителю Савво, первопастырю и  
учителю Сербский, дивный чудотворче.

### **Кондак 6**

Проповедник Православныя веры явился еси  
в Сербии, Савво священне, егда в соборнем  
храме твоём Жичстем символ Православныя  
веры громогласно исповедал еси, и сей  
исповедати паству твою научил еси, да вси  
единомысленни пребудут с тобою, и возмогут

единеми усты и едином сердцем пети вкупе с тобою песнь хвалы и благодарения Триипостасному Богу: Аллилуия.

### **Икос 6**

---

Возсиял еси, святителю Христов, яко звезда пресветлая в отечестве твоём земнем, и люди твоя в Православней вере и благочестии утверждал еси златословесными поучениями твоими, ереси же и расколы искоренял еси мечем слова Божия. Сего ради тя, яко ангела Божия люди сербстии почитаху, зовуще и велегласно глаголюще:

Радуйся, архиерею, власть вязати и решить достойно восприявый;

Радуйся, иерарше, во всеоружие Христово облеченный;

Радуйся, пастырю добрый, готовый душу свою положить за богоданныя ти люди и паству твою;

Радуйся, усердный делателю винограда Господня;

Радуйся, светильниче, сияющий и просвещающий сердца человеческая;

Радуйся, лучу пресветлый Солнца правды Христа;

Радуйся, чудотворения даром от Господа прославленный;

Радуйся, исцеления многая рукама твоима совершивый;

Радуйся, расслабленного молитвою твоею здрава сотворивый;

Радуйся, вражду единокровных благодатно умиротворивый;

Радуйся, в стан неприязненных един ходивый;

Радуйся, словесы твоими враждовавших смиливый;

Радуйся, умершего брата краля Стефана воскресивый и желание его исполни, в иночество облекий его, нарекши Симоном.

Радуйся, святителю Савво, первопастырю и учителю Сербский, дивный чудотворче.

### **Кондак 7**

Хотение едино имел еси, святче Божий, еже Богу благоугождати и спасению душевному ближних твоих служить. Сего ради не дал еси

сна очима твоима, ни веждама дремания, неленостно подвизаяся во благо святых Церкви Сербския и во спасение и пользу вверенных ти от Бога благоверных людей, и воистинну соделался еси столпъ Православия и сохранение народа сербскаго непоколебимое, иже ты нелестно хвалит и зовет укрепившему ты Церкви Зиждителю Христу: Аллилуия.

### **Икос 7**

---

Новаго ты Николая Мирликийскаго и Златоуста Цареградскаго стяжа земля Сербская: чудесы бо твоими первому подобен был еси, златословесными же учении второму подражал еси, святителю отче нашъ Савво, воистинну достойный благохвалений таковых:

Радуйся, немолчный проповедниче Евангелия Христова;

Радуйся, верный последователю преданий апостольских;

Радуйся, святых богоносных отец нравы себе усвоивый;

Радуйся, теплый молитвенниче о душах наших;



Радуйся, неусыпное моление в типикарнице  
карейстей на Афоне совершати повелевый;

Радуйся, благовременно и безвременно  
паству твою благочестию поучавый;

Радуйся, мечу, ереси и расколы посекаяй;

Радуйся, гrome, соблазнительей устрашаяй;

Радуйся, обидимых заступниче;

Радуйся, вдов и сирот благодетелю;

Радуйся, скорбящих утешителю;

Радуйся, кающихся с Богом примирителю;

Радуйся, отроков богомудрый наказателю;

Радуйся, младенцев любвеобильный  
покровителю и богомудрый наставниче.

Радуйся, святителю Савво, первопастырю и  
учителю Сербский, дивный чудотворче.

### **Кондак 8**

Странник и пришлец восхотел еси, Христа  
ради быти, святителю Савво, подражая Спасу  
душ наших, не имевшему где главу приклонити,  
Егоже ради ты отечество твое оставил еси, и на  
поклонение святым местом в различныя страны  
потекл еси, с верою и любовью святыням в них

поклонялся, милостыню же многу церквам, обителем и нищим раздавая и воспевая присно Богу: Аллилуия.

## Икос 8

---

Весь в Бозе бывый, святителю преподобне, о Бозе стопе твои странничестеи направил еси и во святем граде Иерусалиме, места святая, житием и страданием Христа Спасителя ознаменованная, молитвенно обходил еси, сим поклонялся и слезы теплыя от очию твоею изливая, яко жертву любви твоея к пострадавшему нас ради Господу, Иже внушает нам вопити тебе:

Радуйся, мудрый странниче, иский отечества небеснаго;

Радуйся, Христов избранниче, презревший вся блага земная;

Радуйся, святаго града Иерусалима дольного благоговейный поклонниче;

Радуйся, светлаго града Иерусалима горняго усердный и мудрый искателю;

Радуйся, Царьград, Палестину, Египет, Синай и Афон посетивый;

Радуйся, Ливию, Фиваиду, Антиохию, Сирию  
и Армению обходивый;

Радуйся, по морю и суши многотрудно  
путешествовавший;

Радуйся, многия великия святыни в пути  
твоем собравый;

Радуйся, от пастырей Православная Церкве  
везде с любовью и честью приемлемый;

Радуйся, от нищих и убогих за благотворения  
твоя благословляемый;

Радуйся, пленников свободителю;

Радуйся, пустынножителей утешителю.

Радуйся, святителю Савво, первопастырю и  
учителю Сербский, дивный чудотворче.

### **Кондак 9**

---

Вси иноцы великия Лавры преподобнаго  
Саввы Освященнаго с радостию сретоша тя,  
богомудре Савво, егда к ним на поклонение  
пришел еси, и познаша тя дивнаго пришельца,  
от лет древних им обетованнаго. Темже тебе, яко  
достойному, жезл преподобнаго Саввы  
Освященнаго и две иконе Богородични  
чудотворней, Троеручицы и Млекопитательницы

именуеи, на благословение дароваша ти,  
поюще гласы преподобными Творцу всяческих  
Богу: Аллилуия.

## Икос 9

---

Ветийство человеческое не довлеет к  
прославлению многих чудес твоих, святителю  
иерарше приснопамятне: море бо волнующееся  
молитвою твоею укротил еси, и рыбу дивно из  
глубины морския в корабли приял еси,  
недужныя возложением руку твоею исцелял еси  
и мертвыя преславно воскрешал еси, яко  
верный ученик Христа Бога. Темже тебе вопием  
хвалебно, ублажая тя сице:

Радуйся, обетований Евангельских  
исполнение приемый;

Радуйся, смирением высокая стяжавый;

Радуйся, врачу безмездный, исцеляяй недуги  
душевные и телесныя;

Радуйся, целебниче благодатный в болезнях с  
верою к тебе притекающим;

Радуйся, яко руце твои честней орудия целеб  
явистася;

Радуйся, яко сею возложением молитвенным,  
болящим здравие подавал еси;

Радуйся, яко в чуждых странах пребывая,  
имя Христово чудесы твоими прославляя еси;

Радуйся, яко от града в град преходя, верныя  
во благочестии утверждал еси;

Радуйся, яко от востока и до запада хвально  
бысть имя твое;

Радуйся, яко ближних и дальних усердно ко  
Христу приводил еси;

Радуйся, вселенную яко солнце пресветлое,  
обтекий;

Радуйся, яко луна полная богоугодное течение  
совершивый.

Радуйся, святителю Савво, первопастырю и  
учителю Сербский, дивный чудотворче.

### **Кондак 10**

---

Спасения надежду несумненную имея,  
святителю угодниче Божий, во град Тернов  
пришел еси и zde конец странствия земнаго  
совершил еси, почив о Господе кончиною  
праведною и святою, ею же мног плачь земли  
Сербстей сотворил еси. Обаче веруем, отче и  
архиерею наш, яко аще и вне отечества, по  
смотрению Господню почил еси, неразлучен же с

ним духом твоим пребываеши и выну молишися Богу о воспевающих Ему песнь: Аллилуия.

## **Икос 10**

---

Царя Небеснаго Христа верный раб и служитель был еси, богоносне отче наш Савво, и аще почил еси о Господе сном смерти, обаче чудотворити не престаеши и по смерти: священная и всечестная рака твоя лечебница явися недугом человеческим, и самая персть от гроба твоего целебна бысть, яко всем звати тебе:

Радуйся, первопрестольниче святе Сербския страны, со святыми почиваяй;

Радуйся, угодниче Христов, и по смерти преславно чудодействуяй;

Радуйся, град Тернов преподобною твоею кончиною освятивый;

Радуйся, Болгарскую страну чудесы твоими благодатно озаривый;

Радуйся, по желанию твоему в подвиге странствия жизнь скончавый;

Радуйся, вне отечества твоего сном смертным опочивый;

Радуйся, яко смерть твоя честна пред Господем;

Радуйся, яко успение твое торжествует святая Православная Церковь;

Радуйся, яко архистратиг Сербския страны, воем ея во бранех побораяй;

Радуйся, покровом молитв твоих паству твою присно соблюдаяй;

Радуйся, просвещения духовного распространителю и насадителю;

Радуйся, младенцев и отроков любвеобильный наставниче, училищъ же христианских покровителю и озарителю.

Радуйся, святителю Савво, первопастырю и учителю Сербский, дивный чудотворче.

### **Кондак 11**

---

Пением молебным чествуем тя и величаем, святителю, Божий угодниче, и верно совершаем святую память твою: аще бо и в Сербии просиял еси, вся же Церковь вселенная стяжа тя добля поборника, предстателя и молитвенника ко Господу. Темже, поминая житие твое богоугодное и многия подвиги твоя и чудеса,

прославляем прославльшаго тя Господа Иисуса,  
и смиренномудренно вопием Ему: Аллилуия.

## **Икос 11**

---

Светлостію чудес сияя, любовь твою к  
Сербии показал еси, равноапостольне святителю  
Савво, егда благоволил еси принесенным быти  
святѣмъ мощемъ твоимъ в отечество твое земное;  
ты бо отечестволюбецъ бывъ при жизни, и по  
успении таковымъ явился еси, и к любящей тя  
пастве твоей возвратитися мощами твоими  
восхотелъ еси, да возвеселиши чадъ твоихъ, тебе  
вопиющихъ:

Радуйся, началопастырю Сербскій, паству  
твою молитвенно назираяй;

Радуйся, благий предстателю с верою тя  
призывающихъ;

Радуйся, яко мощемъ твоимъ святѣмъ в Сербию  
принесеннымъ быти восхотелъ еси;

Радуйся, яко волю твою о семъ царю  
Болгарскому Асену в видении возвестилъ еси;

Радуйся, со славою и честию из Тернова в  
Сербию принесенный;



Радуйся, в соборном храме Милешевы, яко  
твоя кафедра, с любовью приятый и честно  
положенный;

Радуйся, братаничем твоим, Сербским  
кралем Владиславом, благоговейно почитаемый;

Радуйся, преемником твоим, святителем  
Арсением, молитвенно ублажаемый;

Радуйся, всеми людьми сербскими радостно  
приятый;

Радуйся, пришествием твоим печаль паствы  
твоя утешивый;

Радуйся, чудеса многими от гроба твоего  
святость твою ознаменовавый;

Радуйся, поля, горы и дебри шествием  
освятивый;

Радуйся, богоугодным житием, мудростию и  
великим тщанием Православие в народе своем  
утвердивый;

Радуйся, благодатным заступлением и по  
отшествии твоём его сохраняя;

Радуйся, ангеле житием, пророче благодатию  
Святаго Духа, апостоле благовествованием,  
мучениче исповеданием.

Радуйся, святителю Савво, первопастырю и учителю Сербский, дивный чудотворче.

### **Кондак 12**

---

Благодати Божия сокровище, святые и нетленные мощи твоя, Савво, отче наш, грех ради наших от нечестивых агарян, врагов христианских, огню предани быша. Обаче веруем, яко ты и ныне с нами еси, якоже и прежде, егда благоволил еси мощами твоими видимо род свой утешати, и молитвами твоими нас сохраняеши от всякаго зла. Темже покланяющеся месту святому, на немже мощи твоя злочестивыми огню предашася, лобызаем персть, ими освященную, и поем Богу: Аллилуия.

### **Икос 12**

---

Поюще святое и богоугодное житие твое и многая преславная чудотворения твоя, святителю отче наш Савво, смиренно просим тя: не возгнушайся наших не довлеющих похвал, имиже ты, от усердия нашего чествовати дерзаем, но приклони милостивно к зовущим ти всеусердно хваления таковая:

Радуйся, сострадательный и любвеобильный Сербския страны неусыпный хранителю;

Радуйся, яко с нею вкупе от злых агарян в  
мощех твоих огненное искушение приявый;

Радуйся, столпом сияющим до небес над  
сожигаемыми мощами твоими, святость их  
чудесне проявивый;

Радуйся, сожегшаго мощи твоя воеводу  
агарянского грозно наказавый;

Радуйся, и по сожжении мощей твоих  
чудотворити непреставый;

Радуйся, и самое место сожжения их  
благодати причастно сотворивый;

Радуйся, в видениях и сонних верная  
посещаяй;

Радуйся, ближним и дальним помощь твою  
подаваяй;

Радуйся, Православная Церкви боголепное  
украшение;

Радуйся, архиереев славо и похвало;

Радуйся, в лице преподобных сияющая  
звезда;

Радуйся, по Бозе и Богородице, крепкое наше  
упование.

Радуйся, святителю Савво, первопастырю и учителю Сербский, дивный чудотворче.

### **Кондак 13**

---

О, пресвятый и предивный чудотворче, святителю отче наш Савво, Сербския страны покровителю и всех православных христиан предстателю! Приими милостивно сие малое моление наше, в похвалу тебе приносимое, и молитвами твоими ко Господу, избави нас от бед временных и вечных, и сподоби нас вкупе с тобою в Царствии небеснем пети Богу, Спасителю нашему: Аллилуия.

*Сей Кондак глаголи трижды. И наки читется 1-й Икос: Ангельскую чистоту от юности возлюбив... и за сим Кондак 1-й: Избранный от Царя сил...*

### **Молитва первая**

---

О, священная главо, преславный чудотворче, святителю Христов Савво, Сербския земли первопрестольниче, хранителю и просветителю, всех же христиан благонадежный пред Господом предстателю! Тебе припадаем и молимся: даждь нам быти причастником любви твоея к Богу и

ближнему, ею же при жизни святая душа твоя преисполнена бысть.

Озари нас истиною, просвети ум и сердце наше светом Божественного учения, научи нас тебе подражати верно, Бога и ближняго нашего любить и заповеди Господни совершати непогрешительно, да будем и мы чада твоя, не по имени токмо, но всем житием нашим.

Молися, святой архиерею, о святей Православней Церкви и отечестве твоём земном, присно ты любовью чтущем. Призри благоутробно на всяку душу верных твоих чтителей, милости и помощи твоя ищущих, буди всем нам в болезнях целитель, в скорбех утешитель, в печалех посетитель, в бедах и нуждах помощник, в час же смертный милостивый покровитель и защититель, да помощью молитв твоих святых, сподобимся и мы грешнии спасение верное получитьи и Царствие Христово унаследовати.

Ей, святче Божий, не посрами упования нашего, еже на ты крепко возлагаем, но яви нам твое многомогущее заступление, да славим и поем дивнаго во святых Своих Бога Отца и

Сына и Святаго Духа, всегда, ныне и присно и во веки веков. Аминь.

## Молитва вторая

Во святителях великое украшение, богомудре отче Савво, молимся раби твои и припадающе, вопием ти: не остави своих чад, отче, но буди всегда с нами, якоже обещался еси, да и мы по долгу воспоем тя, ублажим тя и прославим величие и силу твою и достойную песнь принесем ти, вопиюще и глаголюще: тебе ублажаем, святителю; тебе воспеваем, светильниче; тебе покланяемся, отче Савво! Моли, молимтися, спаситися поющим святую твою память. Аминь.

